

Pemimpin, rakyat saling membantu

**Tugas
membangunkan
negara
tak boleh diserahkan
bulat-bulat
kepada
pemerintah**



**NIK SALIDA
SUHAILA**

Pensyarah Kanan
Fakulti Syariah dan
Undang-Undang
Universiti Sains
Islam Malaysia

Memakmurkan negara bukanlah satu tanggungjawab mudah kerana untuk menjadi umat yang berkualiti, sekaligus menghimpun ummah dihormati perlu memakan masa berpuluh tahun.

Keputusan pemimpin umat Islam hari ini ialah untuk memantapkan siasah dan menekuni jihad kehidupan dunia demi kesejahteraan di akhirat. Orang yang berilmu dan mempunyai pegangan agama saja yang boleh merealisasikan wawasan agama dan negara.

Pelbagai bentuk penindasan terhadap umat Islam dan negara Islam hari ini, bagaimanapun, kita di Malaysia

masih lagi dianugerahkan nikmat, negara terus dibangunkan dengan kestabilan berpanjangan.

Rakyat, pemimpin rancang keperluan negara

Rakyat dan pemimpin saling merancang keperluan negara dan saling menerima teguran dengan harapan ia dapat membina kejayaan yang sentiasa memihak kepada kebajikan golongan tidak bernasib baik.

Tanggungjawab memakmurkan negara bukan terletak di pundak pemimpin semata-mata, sebaliknya setiap rakyat terutama umat Islam perlu mengambil berat soal kesejahteraan, keamanan, keharmonian, diplomasi, kesepakatan dan ikhlas terhadap perjuangan.

Apabila melantik pemimpin, ia tidak bermakna orang yang dipimpin menyerahkan tanggungjawab seluruhnya kepada ketua. Alangkah indahandainya setiap seorang di antara kita mengambil berat soal kebajikan saudara seagama sehingga setiap rakyat turut memainkan peranan sebagai pemimpin kepada ahli masyarakat lainnya.

Allah SWT berfirman: *“Dialah yang menjadikan bumi bagi kamu mudah digunakan, maka berjalanlah di merata-rata ceruk rantau serta makanlah daripada rezeki yang dikurniakan Allah dan ingatlah kepada Allah jugalah (tempat kembali kamu sesudah) dibangkitkan semula (maka hargai-*

lah nikmat-Nya dan takutilah kemurkaannya.” (Surah Al-Mulk, ayat 15)

Al-Quran dan hadis tersedia sebagai panduan bagi umat Islam, bagaimana hendak memimpin dan memakmurkan negara. Tentunya tidak sekali-kali melanggar tabii manusia, malah itulah yang lebih utama.

Manusia dilantik sebagai khalifah untuk mengurus tadbir dunia dengan sempurna bukan memusnahkannya, jadi caranya seperti yang telah diajar oleh Allah SWT.

Malah, jika berlaku sebarang pencerobohan ke atas hak setiap makhluk Allah SWT yang dilakukan tanpa keizinan Allah SWT, wajiblah kita kembali kepada Allah SWT dengan memohon keampunan dan taubat.

Firman Allah SWT: *“Dialah (Allah) yang menjadikan kamu dari bahan-bahan bumi, serta menghendaki kamu memakmurkannya. Oleh itu mintalah ampun kepada Allah daripada perbuatan syirik kemudian kembalilah kepada-Nya dengan taat dan tauhid. Sesungguhnya tuhanku sentiasa dekat lagi sentiasa memperkenankan permohonan hamba-Nya.”* (Surah Hud, ayat 61)

Imbangi keperluan hidup dunia, akhirat

Umat Islam perlu mengimbangi keperluan hidup di dunia dan akhirat dalam usaha memakmurkan bumi

ini. Justeru, peranan merancang sekali gus melakukan setiap perincian pelan strategik negara adalah semata-mata untuk faedah setiap individu, keluarga, masyarakat, bangsa, negara dan agama.

Firman Allah SWT: *“Dan ingatlah ketika Tuhanmu berfirman kepada malaikat sesungguhnya aku hendak menjadikan seseorang khalifah di bumi.”* (Surah Al-Baqarah, ayat 30)

Ketangkasan berfikir untuk menyelesaikan sebarang masalah memabitkan perselisihan antara umat Islam melambatkan keperibadian khalifah di bumi yang dilantik Allah SWT. Permusuhan dan persengketaan hanya membawa misi kegagalan.

Allah SWT berfirman: *“Sesungguhnya Allah tidak akan mengubah apa yang ada pada sesuatu kaum sehingga mereka mengubah apa yang ada pada diri mereka sendiri.”* (Surah Al-Ra'du, ayat 11)

Kita seharusnya sedar setiap apa yang dilakukan di dunia adalah untuk mendapatkan keredaan Allah SWT. Setiap komitmen untuk memajukan diri serta membangunkan modal insan mestilah berpaksikan hukum supaya kita tidak tersilap mengutar langkah.

Ummah terbaik adalah mereka yang berupaya mendekatkan jurang peribadi mengikut qudwah hasanah Rasulullah SAW, sahabat dan wanita beriman yang hampir dengan baginda, melalui ilmu yang diamalkan.